

Oshki dibaajimowin bagidinigaade Anishinaabe Gagwedwewin – October 2010

Ontario Wiin Oshki Asiniikewin Odoonaakonigewin

Megwaa apii December 2009, ogimaa gaabaminang gichi anokiiwin giuwedinong asiniikewin gaye giishka'aakwewin ogiipagidinaan ogagwedwewin mazina'igan ge'izhinaagwak biminizha'igewin gaye dash ogii'izhi bagidinaan Ontario akiwi gikinawaajibii'igewin (EBR) 130 dasogon inigok. Miidash gaa'izhiseg 30 giipiijinizha'igaadewan ozhibii'iganan. Dago gaye ningiipi wiindamaagoomin awashime 500 gaagiipi wijiwigoo'aang maamaw 20 gikino'amaagewi maawaji'iwewining gaye dash 12 gikino'amaagewinan gaagiipagidinamowaaj ji'izhaawaaj gichi anokiiwinan gaadibendamowaaj, anishinaabeg gaye wiisaakodewiniwag, akiwi nanaagajichigewi bimiwijigewinan, odenaawi ogimaag gaye gaadibinawewisiwaaaj akiini. Oma gaa'ani ozhipii'igaadeg gaagii'ikidonaaniwang.

Asin Nanandawaabajigewin gaye Anokiiwin Ge'onjiimagag

Ontario ogimaa odooski asiniikewi onaakonikewin da'onjimashkawisiimagan asiniikewin bekish ji'izhi wiji'iwemagak gaa'izhi baatiinakin giuwetinong, bigwadakiing gaye anishinaabe dashiikewinan ji'ondinamaasomagakin anokiiwinan gaye ge'onji minose'igowaaj obimaadisiwiniwaa. Dago gaye, owe oshki onaakonigewin da'izhi wijiitwaamagan anishinaabeg ogagwejimigowiniwaa, jibayatenaagwanig onaakonigewinan gebiminizha'amowaad asiniikewiniwag gaye ji'ajiwinigaadeg jimaanzhi dojigaadesinog aki apii animaadanokaadeg asiniikewin.

Noogomiike gaagiimaamawi gagwejimidinaaniwakiban, bangii giitebinigaade wiji'inedamowin. Daabishkoo, gaagii waawiindamawindwaa ge'izhi gikendamowaaj asiniin gananaadawaabamaawaaj jimiinidwaa anokii manzan'iganens kemaaji'oshki miinaaganiwij apiji giikichi aabadan e'onji gikendamo'itinaaniwang oshki asiniikewi onaakonigewin. Gii'ikidowag gaye awashime jibagidinigaadeg owe gikendamo'iwewin gakina bigo wenen jinisitawendag enanokaadeg asiniikewin – miidash gaye jigii aanjinikaadegiban asiniikewin gikendamo'iwewin ji'izhinikaadeg.

Onizhishin maamakaadaabikong gaagii achikaadegin asiniikewin gikendamo'iwewin gikino'amaagewinan, ozhisijigewinan gaye anokii mazina'igan, gaye asiniike anokii diba'akiiwin. Giinisidawinigaade ji'sanagegendami'igowaaj aanjichigewini aanind, gii'aabadaan dash ji'ani'bimi aabadak akiwi gikinawaabanjigewin. Giiwiindamaagewag gaye ji'achigaadegin wiindamaagewinan MNDM ogimaa ozhibii'igewigamigoon jizhaawaaj ji'andawi'waabandamowaaj gaa'ayaasigwaa maamakaadaabikon.

Owe ge-onji-dibaabadeg anokiiwin, aanind awi'ag ogii'inendanawaa jigii-tagomiinindwaaban gaadibaabadeg anokiiwin ji-diba'ige'indwaa, dago gaye gakina diba'igewinan gaa'onjiigin anishinaabe dashiikewinan gaawiidanokiimindwaa nanaandawi asiniikewining. Gii'ikidowag gaye jikii aabadakiban onaakonigewines diba'igewin ji'aabadak, daabishkoo jidibi-miinindwaa ganage minigok bezhigwaa jibii'aaganiwit apii ge'ani maadanokaadang gaagii tibaabandag gaawii'izhi nanaandawasiniweej.

Gii'izhi-waabanjigaade gakina anokiiwi izhichigewinan gaye gaa-miinindwaa asiniikewin jidodamowaaj gakina gegonan weweni ji'wiinjigaadegin. Dago gaye iniwe ozhisijigewinan gaye anokii mazina'igan gaa'ayaawad aniin apii mayaa gemaajitaawaaj gaye ge'izhi giizhanokiiwaaaj, gaye bigo gakina gegoonan jinaanaagajichigaadegin akiing gaye anishinaabe otaakiiming.

Ogii-gikinawaajitoonaawaa gaye geyaabi ge-naanaagajichigaadegin. Daabishkoo, ogimaa kemaagaadibinaawe bimiwinidisoj (dazhiikewin gaa'ayaag gichi giki'no'amaagewigamig) wiinawaa ji-

anokaadamowaaj gikendamo'iwewinan? Iiwe gaye gaagii tazhindeg maamakaadaapikong ji'onji dibaabandeg aki, gii'andawenjigaade geyaabi ji-dazhindamaadinaaniwak aaniin tasin gemiinindwaa gaye ge'ikwaagin diba'akaan.

Ogii'inendanaawaa gaye onowe ozhibii'iganan ini nanandawaabajigewinan magizha gaye mazina'iganesan geyaabi nawaj jibayate wiidegin mayaa jinisidotaagwag gaye jigechinaawinaagwak. Anind gii'ikidowag onowe mazina'iganesan jigiipimi aabajitoowaapan bezhig akonaag nizho biboon, aanind gaye gii'ikidowag bezhigobiboon gaawin daadebisesiin minik jibimi gaakagawejimindwaa anishinaabeg. Aapiji gebaatiinakin inanokiiwinan gaawii'tazhindamaaged dagii'izhiweban ji'maadanokaadeg asiniikewin mii'ima apane gegii'onji wanishkwebijigaadegin anishinaabeg omanidoo miinigoowinan gaye odoogimaawi'dibendisowiniwaa. Izhiseban dash niigaan jigii tazhindamaatingiban gaye jigii naanaagajichigaadegiban aaniin nawaj gegii izhi ajiwischigaadegiban jimaanzhisesigwaa anishinaabe dashiikewinan.

Anishinaabe Gagwedwewin

Ini gaa-ini-aanjibii'igaadegin ima Asiniikewin Onaakonigewin dagii-izhise jiwii-ji'indaaw Anishinaabe gaye Wiisaakodewininiwag daazhiikewinan weweni jidodawindaaw aniish ima ozhibii'igaade ekanawaabandeg Anishinaabe omiinigoowiziwin gaye odiba'amaagowin. Owe gaaganawaabadeg imaa izhi'ashijisin Onaakonigewining chakibii'iganes, gaye Anishinaabe gagwedwewin ge-izhijigaaniwangin danaagwaanoon ayapii ima onaakonige mazina'iganing gaye ima gebiminizha'igadegin.

Megwaa giibimi wiidanokiimindwaa anishinaabeg, gii-paatiinowag gaagii naabi wiindamowaaj epiiji gichiinendaagwak aki gaye nipi anishinaabe gaa'onji bimaadisij gaye gaa'andawendaagwak ji'manaajichigaadegin anishinaabe gaa'izhi bimaadisij. Gii'tazhindamaadiwag gaye gaaniigaanisiitamaagewaad anishinaabe gaye wiisaakodewinini dashiikewinan gaa'ayaagin wegonen gedazhindeg. Nitam gaagii maajii dazhindamaadiwaapan anokiiwigimaag gaye anishinaabeg gaye dash e'andawendaagwak weweni jizhisemagak gagwejiimewewinan aaniin gedoojigemagakin anokiiwinan mii'owe gaye gaagii tazhindeg.

Aanind ayyag odebwetaanaawaa anishinaabe ishkoniganan awashime jigii'pabaamisiwaapan jigikendaakotoowaaj aandi mewinzha gaagiipitanakamigiziwaad, gaye niigaan jigii gikendamo'indwaaban ewii nagishikawindwaa. Gii'ikidowag gaye ogimaawin besho jigii wiidanokadangiban anishinaabe dashiikewinan ji'onji gikendaakwakiban aaniin gegii'izhi wiidanokiimidaaniwakiban, gaye ji'wijigaabawitawindwaa anishinaabeg gewiinawaa jidagwiiwaj anokiiwining.

Owe gaanaanaandawi'gikendaagwakin anishinaabe gaa'izhi odakiimid, gaye aanind gii'ikidowag geyaabi jigii payatetaagomojigaadegin wiindamaagewinan gaye ogimaawin jigii onji ganawaabanjigetamaagepan, godagiyag gii'ikidowag nawaj jigii payate nisitotaagomochigaadegiban gaye jiwensinaagwak anokiiwin gaawi'anokaadeg, awashime jikiitagwakiban wiinjigewinan gaye imaa dashiikewining jigii onji anokaadegwaaban.

Nitam gii'izhi onenjigaadeban maamow wijigaabawiitaadiwin gaye wiidanokiimidiwin ogowe anokiiwigimaag gaye anishinaabe dashiikewinan, dago gaye bakaan ji'onjiig onendamowin, miibigo gakina izhinaakwak ji-gii miinonigaadegibaniin gegoon gaa'izhi maanzhiseg.

Gii'ikidowag gaye aanind gegoonan geyaabi ji-dazhindengin. Daabishkoo aanind ikidowinan e-wijigaabawitamowaaj gaa-wiipayatetaagomochigaadeg minigok gebomiseg anokiiwin gaamiinomigaadeg, gaye o-wijigaabawiitaanaawaa gaagii-ikidowaj ogimaawin jigii-

paminangiban gegoonan gaa-waniinaaniwang gaa-gagwe'miinwachigaadegin. Godagiyan gii'ikidowag ji-payate nisdotaagwakin gaye ji-wensinaagwakin anokiiwin gaa'wii anokaadegin gaye jigigateg nisdotamowin gaye jidibatamawindawaa minigok gebimiikamowaad ji-onji maazhisesinog wiidanokiimidiwin. Bebakaan inendamowinan gii-pagidinigaadewan awenen gegii-tiba'angiban gaabimanokaadegin gwayakosijigewinan – ogimaawin kema gaagii-maajinishkaatooj.

Asin Ganawenjigewin gaye Nishike Gaadibendaang Akiini Biminizha'iganan

Beshig gaawii-dojigaaniwang ima oshki asiniikewin onaakonigewin ewii nadamagemagag ge-maanzhisegin nake asiniike anokii'ogamigoon gaye igi nishike gaadibendamowaad akiini gawiin gaadakoonamowaad ini asiniike mazina'iganan ima odakiimiwang. Iwe oshki asiniikewin onaakonigewin izhi bagosendaagwan gakina Ontario gaagabezhiwaad ji-gii'onji wiidookaagowaad, gaye dash noongom bakaan ji'inaanokaadegin gaa-diba'akiiwaad asiniikewigimaag gaye weweni ji-naanagajitowaad gaa-izhi gagwedwewaad ewii'izhi diba'akiiwaad gaye ji-dibaa'bamaawaad ini gaadibendaminid odakiimiwaa gaye anishinaabe dashiikewinan.

Ini gaa-giipigiwemagakin ikidowinan o-wijigaabawiitaanaawaa awashime ji-bagidinigaadeg wiindamaagewin ge-izhibaminamowaad asiniin gaa-nanaandawaabamaawaad gaye akiing gaa-nanaandawaabamaawaad asiniin bekish ji-onji di-baabamaawaad gaa-dibinawesinid akiini.

Gii-wabanda'iwewag aandi ineke akiing geyaabi ge-izhi'dazhindeg. Daabishkoo, aanind o-giimisawendaanaawaa jibayate wiindeg ini gaa-dibinawewisiwaad akiini gaye asiniin gaa-nanaandawaabamaawaad ji-giiwe bagidinigaadeg gaa-gii gibitinigaadegiban asiniikewi mashkawisiwin gaa-gii ikidowaapan gaa-bagidinaaganiwid wagiidakamig ji-dananokij, gaye godagiyaag o-gii'andawendaanaawaa minziwe ji-wiinjigadeg gaa-wii kiwe baakinigaadeg asiniikewi mashkawisiwin iimaa gaa-izhi dibinawewisanaaniwang aki.

Niigaan e-inaabinaaniwang, megwaa gii-bimi naanagajichigaadegin ikidowinan gaye onaakonigewinesan e-ani bimi ozhisijigaadegin, aanind bakebii'iganan gaa-gii aanjibii'igaadegin oshki asiniikewin onaakonigewining da-animaadanokiimagan apii nisin akonaag naanobiboonagaag.

* * * * *

Sidebar

Geyapiijimimagag ono Geyaanjisegin

Aazha noogom gaa-izhiseg

Gaagiiyaanjibii'igaaniwang maano jigii-nanadokii'inaniwang, gakinawaajijiganiwang gaye nanandawaabajigewin iwe ewii-ozhijigaaniwangibaniin ini asiniikewin, maya jigii-ganawaabadeg gaye gejinaaj jigi-jiwsegibaniin ini Anishinaabe omiingoowziwinan gaye odiba'amagowinan ima chakibii'igan 35 ima giji onaakonige mazina'iganing, 1982, gaye iwe gagwedwewin, gaye jigii-agaasiseg iniwe gebigaamiseg ima onji izhijigewinan nake mino'ayaawin gaye oma akiing.

Giizhaad da'azhesewan ini giji ogimaakwe asiniike odibejigewin ima shegoya'ii nishike gaadibenjigaadegin dinowaa imaa zhaawanong Ontario.

Ozhki aanjibii'iganan onji maajijigewinan ima shegoya'ii Asiniikewin Onaakonigewin

Ozski aanjibii'iganan onji gaa-onizhizhid asiniins odibenjigewin dino bimiwijigewin

Ge-izhiseg ishkwa inini onaakonigewinan ozhijigaadegin:

Apii ingo-biboonagaag

Dadibaadoonde mazina'iigino gakinawaajijigewin imaa zhaawanong Ontario

Gebiminizha'igadeg apii mooshkinebii'igaaniwang ji-azhe odaabinigaaniwang iwe giji ogimaakwe asiniike odibenjigewin ima shegoya'ii nishike gaagi-jiwinaangin dino ini imaa giuwedinong Ontario

Aanjibii'igan ini akiin gaabaak'sisigin jigii-gaginawaajijigaadegin gaye nanandawaabajigewin

Akiing gaa-dazhi nanaandawasiniikaaniwang dago tax gaa-diba'igaadeg nitam gaa-gii ozhisijigaadegiban asiniikewining giiship dash asiniikewin gaa-aabadasinog

Ozhki aanjibii'iganan jigii-bagidinigaadegibaniin ini ogidakaamig gaginawaajijigaadegin jiyaabadagin bakaan jigii-inaawdeg in daabshko ozhki waasigan dino izhijigewinan gaye jiganawedaagogin ini Anishinaabe gaa'inaadizid dino

Apii niizhin ako niso biboonagaag

Nanandawaabajigewin izhijigewinan gaye mazina'iganesan ga-onaakonigemagagin ini nitam nake anandawaabajigewin debwe jigii-izhisegin ini nanandawaabajigewin ji-ini bimiwijigaaniwangibaniin weweni jigii-ganawaabadeg Anishinaabe gagwedwewinan, nishike gadibendamowaad akiini gaamisawendamowaad gaye jigii-gwayaakosijigaaniwangiban wanashkweseg gegoon ima akiing;

Da-ozhijigaaniwan ge-onji wiindamaawindaaw igi gagijiwinaamowaad asiniike mazina'iganesan, jigii-weweni wiindamaawindaaw aniin ge-izhijigewad ima shegoya'iing Asiniike Onaakonigewin. Dadagonigaade dibaajimowin ini geyadawendaagogin aniin geyayizhiinaaniwang anishinaabe dagwiid gaye gagwedwewin, giwe'odaapinigewin ini onji nandawaabajigewining, gaye gebiminizha'igadegin iwe wii-gaginawaajijiged akiini gaye nanandawaabadang asiniin ima nishike akiising.

Apii nisin ako nanaan'nibiboonagaag

Maamaakaadaabikoong nake dagii-dodagaaniwan akii mazina'igan wii-gaginawajibii'aang akiini amii weweni ji'izhiseg miziwe Ontario iweni asiniikewin gawii-gagina'waajidood.

Giishpin awashime gegoon wiigigendaman, ganoonz:

Robert Merwin
Director, Mining Act Modernization Secretariat
Giigidowin: 416-327-8266
705-670-5627

Maajiyasijigewin: 416-327-0634

Maamaakaadaabikoong: mingact@ontario.ca